

Cussagl da cumün

Protocol nr. 8 da ls sezzüda dals 1. gün 2010

Ledscha da fabrica

In connex culla revisiun da la planisaziun es üna revisiun da la ledscha da fabrica indispensabla. Il iurist da cumün in chosas da fabrica, dr. Rainer Metzger, cussaglia da far sper las adattaziuns a la ledscha da planisaziun chantunala na be duos o trais müdamaints, dimpersè eir diversas correcturas e cumplettaziuns da plüs artichels. Ils cuosts per sia lavur sun calculats cun fr. 20'000.--. Il Cussagl deliberescha il credit ed elegia üna cumischiun chi s'occupa culla revisiun da la ledscha da fabrica. A quella cumischiun fan part: Reto Pedotti, capo; Jachen Andri Cadonau, schef da fabrica e Michi Beer, commember da la cumischiun da fabrica.

Köhler Juliane, permiss d'ustaria

Il Cussagl conceda a duonna Juliane Köhler il permiss d'ustaria pel Garni Allegra. La taxa pel permiss vain fixada sün fr. 200.--

Stuppan Jachen ed Anne-Laure, chasa d'abitar + Guntern Nicole e Sivertsen Odd Kare, chasa d'abitar

Per far las lavuors da s-chav pro las parcelas nr. 2727 e 2728 faja dabsögn d'üna sgürada dal s-chav. Ils patruns da fabrica da la chasa dubla dumondan il permiss per far ancras temporaras chi tendschan per part suotaint la via da quartier sura. Il Cussagl conceda il permiss culla resalva cha la via da quartier nu das-cha subir ingüns dons.

Implü dumondan els da pudair deponar il material da s-chav sülla parcella 2734. La parcella manzunada es fingià reservada e gnarà surfabrichada d'utuon. Il Cussagl conceda il permiss, però be cun ün acconsentimaint in scrit dal proprietari futur da la parcella nr. 2734.

Via da Prui, permiss special

Per chi saja pussibel da transportar la laina cul Unimog sto il camiun da l'impraisa forestala Cla Duri Janett trafichar duos jadas la via da Prui per prunar intuorn la laina in Muntatsch. Il Cussagl conceda il permiss per duos viadis cul camiun chargià cun laina. Il pais cumplet importa ca. 25 tonnas.

Bügls privats, aua

Ün possessur da chasa dumonda da pudair pagar üna pauschala per l'aua chi cula in seis bügl davant chasa. Il Cussagl nun es perinplet cun quai e decida ch'el haja da montar ün suotcontadur. In quist möd ha'l da sbuorsar be la taxa d'aua.

Il capo: sig. Reto Pedotti

L'actuar: sig. Andri Florineth